

I "joegn talenc" fascegn se prejeta

Tel chèder del projet del Comun general "Leames, en rei con tia Val", l'é stat portà dant saeres e desponibilitèdes de joegn fascegn che dò l'università i se met a la leta de sia comunanza


Sozieta - "Leames, en rei con tia Val" l'é n projet del Comun general de Fascia, pontà via a la fin del 2011, che se met dant de investir sui joegn e si talenc. L'é ben de giusta che nesc joegn vae a studièr e a fèr esperienzes foradecà, ma fossa bel che i posse vegnir de retorn per meter a la leta de sia comunanza chel che i à emparà e dèr n contribut emportant al svilùp de sia val de naa.

La condizion de basa percheche la posse jir coscita, schivan l'risech che chisc joegn, n'outa sturtà sù sie percors de studies zaolà utrò, no i vegne più de retorn, l'é che chiò te Fascia i posse aer possibilitèdes de vita e de lurier.

Con chest projet l'Comun general de Fascia se à metù dant trei obietives: cognoscer la cernudes di joegn fascegn che à tacà via n percors de formazion universitàra, meter a jir na relazion stàbola con i joegn laureé travers scontrèdes olache l'é stat regoet sia proponetes e sia idees, ge prejentèr a la sozieta chisc joegn talenc te la convinzion che a chesta vida posse nascer ocajions e colaborazions tel ciamp del lurier.

Vegnir de retorn per portèr nosc contribut

Angela Pederiva, Pamela Ghetta, Stefano Davarda, Erik Dantone, William Basilico, Luca Planchensteiner, Enrico Cigolla, Erica Scopoli, Maurizio Bonani, Marco Ghetta, Rosa Carpano, Davide Pezzei, Simonetta Iori: l'é i inomes di prumes joegn fascegn che enstadì te sala del consei del Comun general de Fascia à portà dant sia competenzes e sia desponibilitèdes dedant a n publich de imprenditores, operadores economics e raprejentanc de la categories economiches e de la istituzions, che à tout pèrt en gran numer. Chisc joegn fascegn à fat n percors dassen de relief te ciampes n muie desvalives, che va dal design a la



I "joegn talenc" de Fascia se à binà te sala grana del Comun General.

informatica, da la comunicazion a la fisioterapia, dai lengac a l'economia, e n muie de auter amò, percors che i à contà, ence col didament de na prejentazion en power point, con capacità e determinazion, dassen desche imprenditores de se enstesc, palesan l'intenzion de poder scomenzèr a lurèr ence te sia val, a chela che ben segur é resté taché dal pont de veduda afetif, per poder dèr sie contribut.

Na val joena che spieia la calità de noscia vita

Sion la Val più joena del Trentin - l'à dit la procuradora Cristina Donei - e coscì volon restèr, ajache chest l'é zenza dubie n indicator contra corent, che spieia la calità de noscia vita. Nesciuna sozieta vel destrabonir si joegn, ge jontèr l'investment fat su de ic, defat la formazion de l'om domana n percors lonch, fat de sinergia anter familia e scola, de n contest vif dal pont de veduda cultural, sozièl, sportif e tinùlta, se sà ben, de la partezipazion al mond produtif.

Duc saon che l'é na crisa grieva che fèsc cruzièr l'Paìs e che la é dò che la met a la proa ence i sistemes produtives più stàboi - la é jita inant la procuradora - saon che a livel naziòl la dejocupazion te anter i joegn à tocià livle da no creer e che ence te noscia tera privilegièda vegn registrà

perzentuèles che no se assanè mai spetà acà vèlch an, ampò peisse che la profescionalità de nesc joegn posse èsser dassen na sort de nef "levà" per noscia economia e che no l'é dubie che la ressorsa umèna abie n post zentrèl te la cernudes strategiches de ogni impresa.

No semper se troa l'miec fora de cèsa

L'mond di "gregn", a chi che se à prejentà chisc joegn, l'à palesà belebon enteress e conscidrazion, che se spera posse se concretisèr prest te vèlch colaborazion o proponeta de lurier, descheche à dit la sorastanta Mirella Florian, che à portà l'salut de la Scola de Fascia e l'à metù al luster apontin l'emportanza che dal teritorie posse ruèr bele prest respostes concretes. A chest propòjit l'joen imprenditor Silvano Ploner à dit de tachèr a chierir profescionalità te cèsa noscia, ajache no l'é dit che l'miec sie semper da poder troèr da fora. L'é stat ence dit che la preparazion de chisc joegn pel èsser dassen de gran ùtol per nosc teritorie e ge é stat sport l'envit a palesèr projec e idees, ajache la val à segur debeseign de sie contribut de inovazion e competenzes. Sul sit del Comun general sarà prest a la leta la lista de duc i joegn enscinué al projet con si referimenc, a na vida che chi che fossa enteressà a i contatèr podarà l'fèr sorì. (cri.m)